

ARREST

1071.

DV GRAND CONSEIL.

30 mars 1

Portant Reglement contre l'Ordre de Malte;
Par lequel a esté iugé que les Curez qui ne
font point Vicaires perpetuels perceuront
toutes les Nouales & menuës Dixmes dans
l'estenduë de leurs Paroisses, nonobstant les
Privileges accordez audit Ordre, par les-
quels les Papes leur donnent le droit de per-
cevoir les Nouales pour la mesme portion
qu'ils perçoient les anciennes Dixmes.




A P A R I S ;

Chez NICOLAS BESSIN, au bout du Pont
de l'Hôtel-Dieu, proche la porte
de l'Archeuesché.

M. DC. LXXII.

THE NEWBERRY
LIBRARY



IL EST A REMARQUER QUE LES
 Privileges dudit Ordre pour percevoir les Noualles dans
 les lieux où ils perçoivent les anciennes dixmes, sont
 restraints dans les lieux où ils sont Curez primitifs, à
 cause que la Bulle d'Honoré III. qui le premier leur a
 donné ce Privilege, porte la clause in parochiis ve-
 stris, & toutes les autres ne sont que confirmatiues;
 En sorte que l'Ordre de Malte perçoit toutes les Noual-
 les dans les lieux, où ils sont Curez primitifs, comme il
 a esté iugé par l'Arrest rendu contre le Vicaire perpe-
 tuel de Saigny, & ont perdu les Noualles dans les
 lieux où ils sont Curez primitifs, comme il est iugé par
 cet Arrest.

LOVIS PAR LA GRACE DE DIEU, Roy
 de France & de Navarre. A tous ceux qui
 ces presentes Lettres verront, Salut : Sçavoir
 faisons comme par Arrest ce jour d'huy donné en
 nostre grand Conseil, Entre nostre bien amé Me
 Mathias du Pont Prestre, Curé de Barbonne de-
 mandeur & requerant l'enterinement des Let-
 tres en forme de requeste civile du 3. Iuin 1654.
 ce faisant qu'il soit remis en tel estat qu'il estoit
 auparavant l'Arrest de nostre Conseil du dernier
 Mars audit an d'une part : Et frere Iean de Hau-
 resens Descluseaux Cheualier de l'Ordre de S.
 Iean de Hierusalem, Agent general de l'Ordre
 de Malte en France, ayant repris le procez au
 lieu de frere François Alexandre Delbenne, Vi-
 vant Cheualier dudit Ordre, Procureur & Rece-

neur du commun tresor dudit Ordre au grand Prieuré de France, deffendeur d'autre, Et entre frere François de Broc, Cinq Mars Cheualier dudit Ordre, Procureur & Receueur general du commun tresor audit grand Prieuré, ayant repris le procez au lieu dudit Descluseaux d'une part, & ledit du Pont deffendeur d'autre. **VEU PAR NOSTRE DIT GRAND CONSEIL**, Les écritures desdites parties, lesdites Lettres & Requestes. Ledit Arrest de nostre grand Conseil, par lequel entre autres choses ledit Delbene audit nom, auroit esté maintenu & gardé en la possession & iouissance de prendre & percevoir les quatre parts dont les cinq font le tout, tant des grosses que des menuës dixmes & Nouales dans l'estendue de ladite Parroisse de Barbonne, & ledit du Pont la cinquième partie, si mieux n'aimoit ledit du Pont recevoir la somme de vingt liures, conformément à la transaction du 8. May 1573. Ledit du Pont condamné rendre & restituer à Nicolle Demeufue, veufue Charles Boulé, ou ses sousfermiers les fruits qu'il auroit pris & perceu pendant les années 1652. & 1653. outre & par-dessus la cinquième partie desdites dixmes. Du 30. Mars 1654. Productions desdites parties, sur lesquelles ledit Arrest seroit interuenue. Arrest de nostre Parlement de Paris donné entre Charles Pelin Curé de l'Eglise Parrochiale de S. Non, & Maistre Philippes de Portes, Abbé de l'Abbaye du Vau decerné, par lequel lesdits Abbé & Curé sont maintenus & gardez en la possession & iouissance de prendre & percevoir chacun par moitié les grosses dixmes de ladite Parroisse de S. Non,

& outre ledit Curé maintenu & gardé en la possession & iouissance de prendre & percevoir toutes & chacunes les menües dixmes & nouales de ladite Parroisse. Du 2. Decembre 1600. Autre Arrest de nostre Parlement de Paris, donné entre Guyon de Noleuars Curé de la Forestiere d'une part, & Guillaume Bertrand & François Demeufue Fermiers de la commanderie de Barbonne, & frere Jacques du Roussel de Mesdauid commandeur de ladite Commanderie, par lequel les parties auroiēt esté mises en tel estat qu'elles estoient auparavant la transaction du 13. Iuillet 1613. & ledit Curé maintenu & gardé en la possession & iouissance de toutes les dixmes de lad. Parroisse de la Forestiere, du 9. Septembre 1630. Coppie collationnée des écritures fournies en l'Officialité de sainte Geneuiève, Iuge des Exempts sur la demande faite par Sébastien Symart Curé dudit Barbonne contre François de Saluari Cheualier commandeur de lad. Commanderie de Barbonne concernant toutes les dixmes & nouales de lad. Parroisse, du 25. Iuillet 1573. Autre coppie collationnée de transaction passée entre Alderic de Lorraine, comme Procureur ayant charge du sieur de Saluari commandeur de ladite Commanderie de Barbonne d'une part, & ledit Symart d'autre, par lequel appert entre autres choses auoir esté accordé tant pour portion concrüe, que pour les nouales de lad. Parroisse la somme de 20. liures audit Symart, & ledit Symart s'estre desisté dudit procez, & de tout le droit qu'il pouuoit prendre ausdites nouales, du 28. Avril 1573. Extraict & collation de l'Official de Paris des années 1530. &

1560. de la Bulle d'Honorius III. de l'an 1225. par laquelle il permet aux Templiers de prendre les noualles dans leurs Parroisses, pour telle part & portion qu'ils perçoient les anciennes. Autre Bulle du Pape Alexandre IV. Par laquelle en confirmant les priuileges donnez sur la perception des Nouales, il permet ausdits Hospitaliers de prendre lescdites nouales, où ils prennent les anciennes dixmes, du 6. Mars 1256. Bulle de Clement V. par laquelle appert de l'extinction de l'Ordre des Templiers & vnion de leurs biens & priuileges audit Ordre de S. Iean de Hierusalem, de l'année 1313. Coppie collationnée, & Lettres Patentes de Philippes le Bel, par lesquelles conformément ausdites Bulles, il donne tous les biens & priuileges desdits Templiers audit Ordre de S. Iean de Hierusalem, du 28. Mars 1312. Arrest de nostre Parlement de Paris confirmatif desd. Bulles & Lettres Patentes, par lequel conformément à icelle, tous les biens & priuileges desdits Templiers ont esté vnis & transferez audit Ordre de S. Iean de Ierusalem. Et l'an 1312. Autre Bulle du Pape Alexandre V. confirmatifue desd. priuileges de l'an 1409. Autre Bulle de Clement VII. portant confirmation desdits priuileges audit Ordre, de l'an 1523. Autre Bulle de Paul III, par laquelle il confirme conformément aux autres Bulles qu'il confirme ausdits Religieux de S. Iean de Ierusalem, de prendre & percevoir les nouales pour la part & portion qu'ils ont aux anciennes dixmes, du 2. Iuin 1539. Autre Bulle de Pie IV. par laquelle il confirme tous lescdits priuileges accordez audit Ordre par les Papes y dé-

nommez, Veut & entéd qu'en toutes les Parroisses & autres lieux où ils perçoient les dixmes anciennes, ils ayent droit de prendre les nouales pour telle part qu'ils perçoient les anciennes dixmes. De l'an 1560. Arrest de nostre Parlement de Paris, par lequel frere Iulian du Four Curé de sainte Geneuiefve de Courbet, & les Religieux Abbé & Conuent de S. Pierre de Chaulnes auroient esté maintenus & gardez respectiue-
ment en la possession & iouissance chacun pour la moitié des dixmes nouales des terres y declarées, du 13. Aoust 1641. Autre Arrest de nostre Parlement de Paris, par lequel entre autres choses Adrian Raguer Curé d'Espinoy les Lusarches, auroit esté maintenu en la possession & iouissance de toutes les menuës dixmes de la Parroisse & territoire dudit Espinoy & lieux en dependans, & le Chapitre dud. Lusarches aussi maintenu & gardé en la possession & iouissance, tant des grosses dixmes que nouales desd. terres & village d'Espinoy, du 2. Mars 1587. Coppie collationnée d'un contract de transaction passée entre Iean Richard Curé de Thorée, & frere François de Marans Cheualier dudit Ordre de S. Iean de Ierusalem commandeur dudit Thorée d'autre part, lesquels apres auoir conuenu entre eux, qu'ils iouyroient & perceuroient les nouales & dixmes des lieux designez & declarez par ladite transaction du 4. Ianvier 1460. Arrest de nostre Parlement de Paris par lequel auroit esté ordonné que lad. transaction du 4. Ianvier 1460. fera entretenüe suivant sa forme & teneur, forts & reserué pour le regard des dixmes, tant anciennes que nouuelles

du vin croissant en ladite Paroisse de Thorée, qui seroient prises par ledit Commandeur, & le Curé dud. Thorée sur les vignes qui estoient en leurs departemens & partitions, sans qu'à l'aduenir elles se partagent entr'eux par moitié, du 31. Aoust 1602. Arrest & Reglement de nostredit Conseil, du 13. Decembre 1634. & 12. Fevrier 1635. Contredits desdites parties, & tout ce que par icelles a esté mis, écry & produit pardeuers nostredit Conseil. Conclusions de nostre Procureur General, Icelvy NOSTREDIT GRAND CONSEIL faisant droit sur les instances, ayans égard ausd. Lettres de Requeste Ciuile, A mis & met lesd. parties en tel estat qu'elles estoient auparauant l'Arrest d'iceluy, du 31. Mars 1654. En ce que par led. Arrest nostredit grand Conseil auroit maintenu & gardé frere Alexandre Delbene Religieux de l'Ordre de S. Iean de Ierusalem en sa possession & iouyssance de prendre & perceuoir les quatre parties, tant des menües dixmes que des nouales de lad. Paroisse de Barbonne, & ledit du Pont condamné rendre & restituer audit Delbene les fruits par luy pris desdites nouales en vertu de l'Arrest de nostredit Conseil rendu par prouision le 5. Iuillet 1633. ce faisant a maintenu & gardé, maintient & garde definitiuement ledit du Pont en la possession & iouyssance, tant des menues dixmes, que des nouales des terres défrichées depuis 40. années iusques au iour de la demande faite par ledit du Pont desd. nouales de ladite Paroisse de Barbonne, A condamné & condamne ledit de Brocq cinq Mars rendre & restituer audit de Pont les fruits desdites nouales perceus dudit du Pont par

ledit Delbene, ou ses Fermiers depuis. Et en execution dudit Arrest de nostredit Conseil, du 31. Mars 1654. & sans dépens entre lescdites parties. Si donnons mandement au premiers des Huissiers de nostre grand Conseil, en ce qui est executoire à nostre Cour de suite & hors d'icelle à nostredit Huissier, ou autre nostre Huissier ou nostre Sergent sur ce requis. Qu'à la requeste dud. du Pont le present Arrest il mette à deue & entiere execution de point en point selō sa forme & teneur, contraignant à faire souffrir & obeyr tous ceux qu'il appartiendra, & qui pour ce faire feront contraindre, nonobstant oppositions ou appellations quelconques, pour lesquelles, & sans preiudice d'icelles ne voulons estre differez & outre faire pour l'executiō des presentes tousexploits de significations, Sommations, Commandemens, Contraintes, & autres actes de Iustice requis & necessaires. De ce faire luy donnons pouuoir, sans pour ce demander placer ny pareatis. En témoin dequoy nous auons fait mettre nostre Scel à ces presentes. **DONNE'** en nostredit grand Conseil, le trente & vniesme iour de Mars l'an de grace 1655. Montré à nostredit Procureur general, & prononcé aux Procureurs desdites parties, à Paris le 12. Avril audit an. Et de nostre Regne le 12. Et seellé.

*Collationné à l'Original par moy Conseiller Secretaire
 du Roy, Maison & Couronne de France & de ses
 Finances.*